

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৩৫/২০১৭-১৮

ঢাকা, সোমবার ২১ আগস্ট ২০১৭, ৬ ভাদ্র ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। ফসল ঘরে তোলা পর্যন্ত ত্রাণ দেওয়া হবে : বন্যাদুর্গত দিনাজপুর ও কুড়িগ্রামে প্রধানমন্ত্রী
- ২। কোটালীপাড়ায় প্রধানমন্ত্রী শেখ হাসিনাকে হত্যাপ্রচেষ্টার মামলায় ১০ জনের মৃত্যুদণ্ড  
: গুলি করে দণ্ড কার্যকরের নির্দেশ
- ৩। বঙ্গবন্ধুর আদর্শ আমাদের প্রেরণার উৎস : রাষ্ট্রপতি
- ৪। নতুন প্রজন্মকে বঙ্গবন্ধুর আদর্শ বাস্তবায়নে কাজ করতে হবে : শিক্ষামন্ত্রী
- ৫। বন্যায় সড়কের ৪১ পয়েন্টে ক্ষতি হয়েছে : সড়কমন্ত্রী
- ৬। বঙ্গবন্ধুর দূরদর্শী সিদ্ধান্তে জ্বালানি খাত শক্ত ভিত্তির ওপর দাঁড়িয়েছে : বিদ্যুৎ প্রতিমন্ত্রী
- ৭। বঙ্গবন্ধুর আত্মস্বীকৃত খুনি ছাড়াও নেপথ্য ষড়যন্ত্রকারীদের বিচার করতে হবে  
: মুক্তিযুদ্ধ বিষয়ক মন্ত্রী
- ৮। ঈদে নিরাপত্তা নিশ্চিত গোয়েন্দা নজরদারি বাড়ছে : স্বরাষ্ট্রমন্ত্রী
- ৯। ভয়াল ২১ আগস্ট আজ : রাষ্ট্রপতি ও প্রধানমন্ত্রীর বাণী
- ১০। কোরবানির পশুর চামড়ার দাম গত বছরের মতোই  
: ঢাকায় গরুর চামড়া প্রতি বর্গফুট ৫০-৫৫ টাকা নির্ধারণ

১। ফসল ঘরে তোলা পর্যন্ত ত্রাণ দেওয়া হবে : বন্যাদুর্গত দিনাজপুর ও কুড়িগ্রামে প্রধানমন্ত্রী

বন্যাদুর্গতরা তাদের ফসল ঘরে তোলার আগ পর্যন্ত ত্রাণসামগ্রী পাবেন বলে আশ্বস্ত করেছেন প্রধানমন্ত্রী শেখ হাসিনা। তিনি বলেন, বন্যাদুর্গতদের নতুন ফসল ঘরে তোলার আগ পর্যন্ত আগামী তিন মাস খাদ্য সাহায্য চলবে। দুর্গতরা সবাই যেন খাদ্য সহায়তা পেতে পারে সে জন্যই এ ব্যবস্থা হচ্ছে এবং এটি অব্যাহত থাকবে। ১০ টাকা কেজি দরে ৫০ লাখ পরিবারের মধ্যে চাল বিতরণ করা হবে জানিয়ে প্রধানমন্ত্রী বলেন, প্রত্যেকের কাছেই ত্রাণসামগ্রী পৌঁছবে। আপনাদের একটু ধৈর্য ধরে অপেক্ষা করতে হবে এবং আমাদের ওপর আস্থা রাখতে হবে। গতকাল ২০ আগস্ট রোববার দিনাজপুর জেলা স্কুলে বন্যাদুর্গতদের মাঝে ত্রাণ বিতরণের আগে তিনি এ কথা বলেন। সূত্র-সমকাল (পৃ.১,ক.৭), সংবাদ (পৃ.১,ক.৬), ইন্ডিপেনডেন্ট (শেষ পৃ.,ক.৫), ডেইলি সান (শেষ পৃ.,ক.২)।

২। কোটালীপাড়ায় প্রধানমন্ত্রী শেখ হাসিনাকে হত্যাচেষ্টার মামলায় ১০ জনের মৃত্যুদণ্ড

: গুলি করে দণ্ড কার্যকরের নির্দেশ

গোপালগঞ্জের কোটালীপাড়ায় প্রধানমন্ত্রী শেখ হাসিনাকে হত্যাচেষ্টার মামলার রায়ে ১০ আসামিকে দোষী সাব্যস্ত করে মৃত্যুদণ্ডের আদেশ দিয়েছে আদালত এবং তাদের গুলি করে দণ্ড কার্যকরের নির্দেশ দেওয়া হয়। গতকাল ২০ আগস্ট রোববার ঢাকার দ্রুত বিচার ট্রাইব্যুনাল-২ এর বিচারক মমতাজ বেগম এ দণ্ডদেশ দেন। একই আদালত গোপালগঞ্জ থানায় দায়ের করা বিস্ফোরক দ্রব্য আইনের অপর একটি মামলায় দোষী সাব্যস্ত করে ৯ জনকে ২০ বছর কারাদণ্ডে দণ্ডিত করেছে। মৃত্যুদণ্ডের আদেশপ্রাপ্ত আসামিরা নিষিদ্ধ ঘোষিত জঙ্গি সংগঠন হরকাতুল জিহাদ (হুজি) সদস্য। অপর মামলার দোষী সাব্যস্ত আসামিরাও জঙ্গি সংগঠনের সদস্য। সূত্র-সংবাদ (পৃ.১,ক.১), ইত্তেফাক (পৃ.১,ক.৬), ইন্ডিপেনডেন্ট (পৃ.১,ক.১), ডেইলি সান (পৃ.১,ক.১)।

৩। বঙ্গবন্ধুর আদর্শ আমাদের প্রেরণার উৎস : রাষ্ট্রপতি

রাষ্ট্রপতি মো. আবদুল হামিদ বঙ্গবন্ধুর নীতি ও আদর্শকে সব প্রেরণার উৎস হিসেবে বর্ণনা করে মুক্তিযুদ্ধের প্রকৃত ইতিহাস জানার জন্য ছাত্রছাত্রীদের প্রতি আহ্বান জানিয়েছেন। তিনি বলেন, বঙ্গবন্ধুকে হত্যার পর স্বাধীনতার বিরোধী শক্তি মুক্তিযুদ্ধের ইতিহাস বিকৃত এবং বিভিন্নভাবে নতুন প্রজন্মকে বিভ্রান্ত করার অপচেষ্টা চালায়। তাই বাংলাদেশের প্রকৃত ইতিহাস জানতে হবে। জাতীয় শোক দিবস উপলক্ষে গতকাল ২০ আগস্ট রোববার ইডেন মহিলা কলেজ আয়োজিত আলোচনা সভায় রাষ্ট্রপতি এ কথা বলেন। সূত্র-সমকাল (পৃ.১৯,ক.৪), জনকণ্ঠ (পৃ.১,ক.৬), ইন্ডিপেনডেন্ট (পৃ.৩,ক.৬), ডেইলি সান (পৃ.৩,ক.২)।

৪। নতুন প্রজন্মকে বঙ্গবন্ধুর আদর্শ বাস্তবায়নে কাজ করতে হবে : শিক্ষামন্ত্রী

শিক্ষামন্ত্রী নুরুল ইসলাম নাহিদ বলেছেন, বঙ্গবন্ধুর আদর্শ বাস্তবায়নই আমাদের লক্ষ্য। তাঁর স্বপ্নের বাস্তবায়নে আমরা কাজ করে যাব। এটাই আমাদের শপথ। তিনি শিক্ষার্থীদের বঙ্গবন্ধুর আদর্শ বাস্তবায়নে কাজ করার আহ্বান জানান। মন্ত্রী গতকাল ২০ আগস্ট রোববার ঢাকা কলেজ অডিটোরিয়ামে স্কুল, কলেজ ও মাদ্রাসার শিক্ষার্থীদের উদ্দেশে বক্তৃতাকালে এ কথা বলেন। সূত্র-সংবাদ (পৃ.৪,ক.৬), নিউজ টুডে (পৃ.৩,ক.১), বাংলাদেশ টুডে (পৃ.৩,ক.৭)।

৫। বন্যায় সড়কের ৪১ পয়েন্টে ক্ষতি হয়েছে : সড়কমন্ত্রী

উজানের পানি ও বন্যার কারণে উত্তরাঞ্চলসহ দেশের বিভিন্ন স্থানের সড়ক-মহাসড়কের ৪১ পয়েন্টে ক্ষতি হয়েছে। তাই এবারও ঈদযাত্রা স্বস্তিদায়ক করাটা চ্যালেঞ্জিং বলে জানিয়েছেন সড়ক ও সেতুমন্ত্রী ওবায়দুল কাদের। গতকাল ২০ আগস্ট রোববার সচিবালয়ে সড়ক ও সেতু মন্ত্রণালয়ের সভাকক্ষে দেশে চলমান বন্যায় সড়ক-মহাসড়কের সার্বিক অবস্থা এবং ঈদ প্রস্তুতি নিয়ে এক জরুরি সংবাদ সম্মেলনে তিনি এই মন্তব্য করেন। সূত্র-সংবাদ (পৃ.১,ক.৮), ইত্তেফাক (পৃ.১৯,ক.২), ইন্ডিপেনডেন্ট (পৃ.৩,ক.৬), এশিয়ান এজ (পৃ.১৬,ক.৮)।

৬। বঙ্গবন্ধুর দূরদর্শী সিদ্ধান্তে জ্বালানি খাত শক্ত ভিত্তির ওপর দাঁড়িয়েছে : বিদ্যুৎ প্রতিমন্ত্রী

বিদ্যুৎ, জ্বালানি ও খনিজ সম্পদ প্রতিমন্ত্রী নসরুল হামিদ বিপু বলেছেন, জাতির পিতা বঙ্গবন্ধু শেখ মুজিবুর রহমানের দূরদর্শী সিদ্ধান্তের কারণেই বাংলাদেশের জ্বালানি খাত একটি শক্ত ভিত্তির ওপর দাঁড়িয়েছে। গতকাল ২০ আগস্ট রোববার রাজধানীর বিদ্যুৎ ভবনে জাতির পিতার ৪২তম শাহাদতবার্ষিকী ও জাতীয় শোক দিবস উপলক্ষে পিডিবি আয়োজিত আলোচনা সভা ও দোয়া মাহফিল অনুষ্ঠানে প্রতিমন্ত্রী এসব কথা বলেন। সূত্র-সংবাদ (পৃ.৪,ক.৪),

৭। বঙ্গবন্ধুর আত্মস্বীকৃত খুনি ছাড়াও নেপথ্য ষড়যন্ত্রকারীদের বিচার করতে হবে : মুক্তিযুদ্ধ বিষয়ক মন্ত্রী

জাতির পিতা বঙ্গবন্ধু শেখ মুজিবুর রহমানের আত্মস্বীকৃত খুনি ছাড়াও পর্দার অন্তরালে থাকা নেপথ্য ষড়যন্ত্রকারীদের বিচারের আওতায় আনতে হবে। উন্মুক্ত বিশ্ববিদ্যালয়ের গাজীপুর ক্যাম্পাসের সম্মেলন কক্ষে জাতির পিতা বঙ্গবন্ধু শেখ মুজিবুর রহমানের ৪২তম শাহাদতবার্ষিকী ও জাতীয় শোক দিবসের আলোচনা সভায় মুক্তিযুদ্ধ বিষয়ক মন্ত্রী আ ক ম মোজাম্মেল হক এ কথা বলেন। সূত্র-সংবাদ (পৃ.৪,ক.৭), ইত্তেফাক (পৃ.৫,ক.৫), নিউজ টুডে (পৃ.২,ক.৫), এশিয়ান এজ (পৃ.১৬,ক.৫)।

৮। ঈদে নিরাপত্তা নিশ্চিত গোয়েন্দা নজরদারি বাড়ছে : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, আসন্ন ঈদুল আজহায় ঘরমুখো মানুষের সার্বিক নিরাপত্তা নিশ্চিত করতে দেশব্যাপী গোয়েন্দা নজরদারি বাড়ানো হবে। আর ঈদে বাড়ি ফেরা মানুষের ভোগান্তি কমাতে আগামী ২৮ আগস্ট থেকে পর্যায়ক্রমে পোশাক শ্রমিকদের ছুটি শুরু হবে এবং তার আগেই বোনাস (উৎসব ভাতা) পরিশোধ করতে হবে। গতকাল ২০ আগস্ট রোববার স্বরাষ্ট্র মন্ত্রণালয়ের সম্মেলন কক্ষে ‘ঈদুল আজহা উপলক্ষে আইন-শৃঙ্খলা পরিস্থিতি পর্যালোচনা, শিল্পাঞ্চলে আইন-শৃঙ্খলা পরিস্থিতি নিয়ন্ত্রণে করণীয়’ শীর্ষক এক বৈঠক শেষে তিনি এসব কথা বলেন। সূত্র-ইত্তেফাক (পৃ.১৭,ক.২), ভোরের কাগজ বাণিজ্য পাতা (পৃ.১,ক.১), ইন্ডিপেনডেন্ট (পৃ.৯,ক.৭), ডেইলি সান (পৃ.২,ক.৬)।

৯। ভয়াল ২১ আগস্ট আজ : রাষ্ট্রপতি ও প্রধানমন্ত্রীর বাণী

রক্তস্নাত বিভীষিকাময় ২১ আগস্ট আজ। ভয়াল বিক্ষোভ, বীভৎস, রাজনৈতিক হত্যায়জ্ঞের দিন আজ। নারকীয় গ্রেনেড হামলার ত্রয়োদশ বার্ষিকী। ২০০৪ সালের এই দিনে বঙ্গবন্ধু এভিনিউতে আওয়ামী লীগের সমাবেশে নারকীয় গ্রেনেড হামলা বাংলাদেশে এক কলঙ্কময় অধ্যায়ের জন্ম দেয়। বঙ্গবন্ধু এভিনিউয়ে আওয়ামী লীগের কেন্দ্রীয় কার্যালয় প্রাঙ্গণ এদিন মুহূর্তেই পরিণত হয়েছিল মৃত্যুপুরীতে। তৎকালীন বিরোধী দলীয় নেত্রী, আওয়ামী লীগ সভানেত্রী ও বর্তমান প্রধানমন্ত্রী শেখ হাসিনাকে হত্যার উদ্দেশ্যে এই গ্রেনেড হামলা চালানো হয়। শোকাবহ আগস্টে গ্রেনেড হামলা উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। সূত্র-ইত্তেফাক (পৃ.১,ক.১), যুগান্তর (পৃ.১,ক.৩), ডেইলি স্টার (পৃ.২,ক.১), ডেইলি সান (পৃ.১,ক.১)।

১০। কোরবানির পশুর চামড়ার দাম গত বছরের মতোই

: ঢাকায় গরুর চামড়া প্রতি বর্গফুট ৫০-৫৫ টাকা নির্ধারণ

এবারও কোরবানির চামড়ার দাম গত বছরের মতোই রাখা হয়েছে। ট্যানারি ব্যবসায়ীরা এবার ঢাকায় প্রতি বর্গফুট গরুর চামড়া কিনবেন ৫০ থেকে ৫৫ টাকায়। ঢাকার বাইরে এর দাম হবে ৪০ থেকে ৪৫ টাকা। এছাড়া সারাদেশে খাসির চামড়া প্রতি বর্গফুট ২০-২২ টাকা এবং বকরির চামড়া প্রতি বর্গফুট ১৫-১৭ টাকায় সংগ্রহ করা হবে। গতকাল ২০ আগস্ট রোববার বাণিজ্য মন্ত্রণালয়ের সম্মেলন কক্ষে চামড়া শিল্প সংশ্লিষ্ট বিভিন্ন

পক্ষের প্রতিনিধিদের সঙ্গে বৈঠক করে বাণিজ্যমন্ত্রী তোফায়েল আহমেদ এই দাম ঘোষণা করেন। সূত্র-সংবাদ (পৃ.১,ক.৫), ইত্তেফাক (পৃ.৩,ক.৫), ডেইলি স্টার বিজনেস পাতা (পৃ.১,ক.১), ডেইলি সান (পৃ.১,ক.৬)।

=৪=

### সম্পাদকীয়

- ক. **ইত্তেফাক, ইন্ডিপেনডেন্ট** : টানা দুইমাস বৃষ্টি আর জলাবদ্ধতার পর চট্টগ্রামের রাস্তা-ঘাটের বেহাল দশার কথা উল্লেখ করে জনদুর্ভোগ লাঘবে দ্রুত সড়কগুলো সংস্কারের ওপর গুরুত্বারোপ।
- খ. **সংবাদ** : বন্যার অজুহাতে বাজারে সব ধরনের নিত্যপণ্যের মূল্য বৃদ্ধিতে উদ্বেগ প্রকাশ করে নিত্যপণ্যের বাজার স্থিতিশীল রাখতে খাদ্য মন্ত্রণালয়সহ সংশ্লিষ্ট মন্ত্রণালয়ের মনিটরিং ব্যবস্থা জোরদার করার সুপারিশ।
- গ. **যায়যায়দিন** : বন্যা কবলিত এলাকায় পর্যাপ্ত ত্রাণ সরবরাহের ওপর গুরুত্বারোপ।
- ঘ. **প্রথম আলো, ডেইলি স্টার** : কর্মক্ষেত্রে নির্মাণ শ্রমিকদের নিরাপত্তা নিশ্চিত করার সুপারিশ।
- ঙ. **ইন্ডিপেনডেন্ট** : জাতীয় সামাজিক নিরাপত্তা প্রোগ্রামের আওতায় নেওয়া বয়স্ক ভাতার পরিমাণ বাড়ানোসহ প্রয়োজনে বয়স্ক ভাতাধারীদের সংখ্যা বাড়ানোর সুপারিশ।
- চ. **ডেইলি সান** : পাঁচটি বেসরকারি মেডিকেল কলেজের মানসম্পন্ন শিক্ষা ব্যবস্থার সুযোগ না থাকায় অতি দ্রুত আইনি পদক্ষেপ গ্রহণের দ্বারা তাদের প্রাতিষ্ঠানিক কার্যক্রম বন্ধ করার আহ্বান।
- ছ. **ডেইলি স্টার** : পঙ্গু হাসপাতালের ব্যবহৃত বিষাক্ত বর্জ্য উন্মুক্ত স্থানে ফেলে রাখায় তা জনস্বাস্থ্যের জন্য হুমকি হওয়ায় জনস্বার্থে সংশ্লিষ্ট কর্তৃপক্ষকে এ ব্যাপারে দ্রুত ব্যবস্থা নেওয়ার সুপারিশ।
- জ. **নিউজ টুডে** : কৃষি, গার্মেন্টস ও বস্ত্রখাতে শ্রমিকদের দক্ষতা বাড়াতে নারী ও পুরুষ উভয় শ্রমিকের প্রশিক্ষণের ওপর গুরুত্বারোপ।
- ঝ. **নিউ এজ** : সাভার ট্যানারি শিল্পের দ্বারা যেন হাজারিবাগের মতো পরিবেশ দূষণের অবস্থা তৈরি না হয় সে বিষয়ে সতর্ক থাকার আহ্বান জানিয়ে সম্পাদকীয় প্রকাশ।

### উপ-সম্পাদকীয়

**ইত্তেফাক** পত্রিকায় প্রকাশিত কলামে উল্লেখ করা হয়েছে, জঙ্গিবাদ মোকাবিলায় সবাইকে ঐক্যবদ্ধ হতে হবে।

### নিবন্ধ ও ফিচার

সংবাদ পত্রিকায় প্রকাশিত ‘শিশুর সৃজনশীলতার বিকাশ ও আমাদের শিক্ষা ব্যবস্থা’ শিরোনামের নিবন্ধে অভিমত প্রকাশ করা হয়েছে, শিশুর জীবনমান বৃদ্ধির জন্য সৃজনশীল শিক্ষা ব্যবস্থার বিকল্প নেই।

#

ডালিয়া/ফাহিমা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা

